

वियोगी आखदेन.....

## भगत जोब

(Book Of Job-- Bible)

वियोगी दी बयाजा भाग-28

तुं बी सदिए में बी आहली बीतेआ हैन्नी,  
पही कियां आखें जे में बाजी जित्तेआ हैन्नी?

Oh! Century you are alive and I am also alive.  
How can you say that I have not won as yet?

मियां कुंवर वियोगी

Name of the Book: भगत जोब

Authors- Kunwar Viyogi

Kunwar Viyogi di Bayaja: Volume- 28.

Editor- Sudha Randhir Chaturvedi

An anthology of writings of Kunwar Viyogi in Dogri, English and Urdu compiled and published by Mrs. Sudha Randhir Chaturvedi.

Copy right---- Sudha Randhir Chaturvedi and Rounak Singh

ISBN: 978-93-90622-58-0

Publisher- Mrs. Sudha Randhir Chaturvedi

Address- Mrs. Sudha Randhir Chaturvedi

M-327, Utsav Ashiana Manglam

Kalwar Road, Jaipur, Raj. 302012

e-mail : [sudha.chaturvedi5@gmail.com](mailto:sudha.chaturvedi5@gmail.com)

Mob. 9829738844,9829245255

[www.kunwarviyogi.com](http://www.kunwarviyogi.com)

year of publication: 2021

Price: 150/-

## प्राकथन

मियां कुवंर वियोगी जी रचित, “भगत जोब” रचना आपके समक्ष प्रस्तुत है। वियोगी जी ने युवावस्था से ही कुरान, बाईबल, गीता का अंग्रेजी में अध्ययन किया था। 2008 के रिडर्स डाइजेस्ट में पुनः Book Of Job - Bible का अध्ययन करने पर वे , जोब की कहानी, डोगरी में लिखने के लिये प्रेरित हुए। लगभग डेढ़ दिन में ही यह रचना लिखी थी।

इस रचना को डोगरी में लिखने के लिये ‘गद्य’ के बजाय ‘पद्य’ को चुना गया। पद्य में भी सानेट, कुंडलियां छन्दों का प्रयोग किया।

डोगरी की इस रचना को संपादित करने के लिये जम्मू आकादमी के श्री बासोत्रा जी की मैं बहुत आभारी हूं।

धन्यवाद

सुधा रणधीर चतुर्वेदी  
नवोंबर, 2021, जयपुर.

दोस्त को समर्पण



सुधा सगधीर

## भगत जोब

1. घरती दै मशरक पासै हा देश पुराना उज्झ  
कुत्थें हा ते केहड़ा हा, हून कोई नेई सकदा बुज्झ  
उत्थें रौंहदा हा इक योद्धा नांऽ हा उसदा जोब  
हर भेठा सदगुणें दै कारण उसदा हा अत रोहब

लहीम अनख पर शेर कलेजा, खुशकिसमत खुशहाल  
सद्बुद्धी ते मैहनत कारण ओह हा माल्ला माल  
ओह हा सच्च जुबाना, निशकलैक खुदा दा बंदा  
अल्लाह कोला डरदा हा ते पापें कोल नेई जंदा

मेहर खुदा दी ओहदैं घर हे त्रै धीआं सत पुत्तर  
सारै घरै दे जीवें बिच्च ही लाड भ्रोची बनतर  
सत्तहजार भिड्डें दा रेबड़ बी हा ओहदैं कोल  
इक-इक भिड्डु ही उन्न भ्रोटी, शैल ते गोल-मटोल

एहदैं अला त्रै हजार हे ओहदे बोत्ते-बोत्तियां  
आलै-दुआलै बनज-बपार ते पूरियां पंज सौ खोतियां ।

2. खेत्तर बाहने ताई हे पंज सौ तगड़े दादें जोड़े  
नौकर चाकर इन्ने जिन्ने गिनगेओ उन्ने थोहड़े  
तां गै लोके हे उसी गलांदे—केह मित्तर केह बैरी  
उज्ज देश दा नेक—पारसा सर्वोत्तम शैहरी

ओहदे पुत्तर बारी—बारी बड्डियां धाम्मां दिंदे  
भैने गी सददे सददे देइयै किट्टे खंदे—पींदे  
हफता—हफता किट्टे—मकिट्टे मौज मसतियां करदे  
वातावरण गी गीत—गीतूड़, खेढें कन्नै भरदे

ऐसी धाम्में बाद जोब हा उं'दी शुद्धी करदा  
चंगे—चंगे सबक सखांदा, पूजा सुद्धी करदा  
उसगी डर हा अनजाने बिच होई निं होऐ कबुद  
बडलै उट्टी पुत्तरें ताई हा माफी मंगदा खुद

भात संभाते पकवानें दे सत्त चढावे चाढी  
सुखा दा साह हे लैंदे योद्धा जोब ते ओहदी लाड़ी ।

3. अल्लाह दे बंदै दी मददी बिच देर नेई करदा  
इहान्ने उप्पर चढ़ी दी म्हेशां थल्लै देग नेई धरदा  
गरीब, भुक्खे भाने खंदे रज्जमारी अन झक्के  
दिक्खने आहले दिखदे रौंहदे होइये हक्के-बक्के

प इक दिन अल्लाह दै दरबार देवी-देवते आए  
ते उंदै कन्नोकन्नी बुढ़कदा शतान बी आया  
देवी-देवतें गुणगान अल्लाह ताल्ला दे गाए  
ते अल्लाह ताल्ला नें शतानै गी एह पुच्छना लाया-

“तूं कुत्थुं आयां ऐ ?” शतानै फौरन परता दित्ता एह  
“ में सारी गाही आयां, कुत्ती ते भलकेरमी दुनियां,  
दगावाजन ते झूठी पेरनी-तुसेंगी दस्सां केह-  
एह किन्नी कुत्ती जात ऐ दमाग फेरमी दुनियां?”

खुदा नैं आक्खेआ, “ मन्नी लेआ, पर जोब ऐ मेरा ।  
मलाटी केह शताना तेरी ओहदें कन्नै नेई होई?

4. उ'दी श्रद्धा दै कारण धरती उप्पर रोहब ऐ मेरा!

उ'दी बरोबरी दा दुनियां बिच भगत नेई कोई  
वफादारी दी मूरत ऐ, सदा मीं याद रखदा ऐ—  
हर इक चीजै गी म्हेशां ओह मेरै बाद रखदा ऐ”

शतान बोल्लेआ— “रौहदा ऐ तुं'दी छत्तर छाया च,  
उ'दा रसूख ते जैदाद तुं'दी मेहरबानी ऐ”  
ओह फलदा फुलदा ऐ तुं'दी गै मेहर्बान माया च  
मिगी जकीन ऐ, बिलकुल निं एह गलत ब्यानी ऐ

तुस हत्थ पुट्टियै दिक्खो— जिमीं जैदाद जंदे गै  
जे गालीं कड्डै निं मौल्ला, शतान नांऽ नेई मेरा  
गुरबत औंदे गै, झंगताल, मंदे हाल होंदे गै—  
तुसं गी भंठी निं औडै तां मेरा बोध ऐ केहरा

तुं'दी मेहरबानी मूजब जोब भगत ऐ तुं'दा  
इ'दैं बगैर ओहदी भक्तिया दा शास्त्र ऐ तुं'दा



5. खुदा नैं आक्खेआ, तेरै हवालै में उसी कीता,  
जो करना ऐ करी लै, हत्थ अपना पुट्टी लैता में  
सुआऽ जिसमानी तकलीफें दै—हक्क में तुगी दित्ता  
तूं भगती मार्गै शा उसगी कि'यां फेरी सकनां ऐं ?

उ'दा रसूख ते जैदाद तूं भलेआं गै खोही लैयां  
प ओहदे जुस्से उप्पर दिक्खेआं खराच निं आवै  
तूं ओहदे बाल बच्चड़े गी मारी—मारी ढोई लैयां  
ख्याल रक्खेआं मुहांदरै बदलास निं आवै

में तुक्की जाननां तूं जिहड़ ऐं ते खूनी जक्कड़ ऐं  
जिच्चर आपूं निं दिखगा तुगी जकीन निं होना  
प तूं इक हूड़मत्तू , मूड़बत्तू , लाल भुझक्कड़ ऐं  
भगत जोब ऐ लसानी ते सजाखड़ा सोहना

जेहड़ी देगा तूं परिक्खेआ उस पास करनी ऐं।  
उसगी पास होंदे दिक्ख्यै तूं तिलमिलाना ऐं।

करै शतान शतानियां, उदा धर्म ऐ करै शतानी  
धर्म नभाना चाही दा एह फतवा ऐ भगवानी

ऐ भगवानी एह फतवा अंते कनून कुदरती  
सारै जीवन करदे अपने कम्म फितरती

मानसून बारश दै राहें—सर—सर भरै  
खिड़ विंद इनसान दा जीना— करै शतान

6 उन्नै विजिन इमदादा दै गै तरनी वेतरनी ऐ  
शताना, इस म्तेहानै च तूं भलेआं हारी जाना ऐ  
पिच्छुं आक्खेआं निं में तुगी मौका निहा दित्ता  
अम्बर पीड़ें ते कश्टें नै बदलोखा निहा दित्ता

सुनी शतानै मारी हुछकड़ी आई धरतरी पुज्जा  
जोब दै ब'ल्ल नशांना लाइयै तीर छोड़ेआ गुज्जा  
बड्डे पुत्तरै घर ही उस दिन इक इड़े सी धाम  
दिनै गी लग्गने आह्ला हा तौले गै पूर्ण विराम ।

चानचक्क इक हफे—हफे दा घर टैहलिया आया  
उन्नै अपने अन्नदाता गी आइयै एह सनाया  
दांद हे हल्ल वाह करदे खेत्तर, कोल चरै दे खोते  
हमला आवर आए ते अस रेही गे खड़े—खड़ोते

नोकर—शाकर मारे उंगर—वैहतर लेइये खिद्धी  
में गै इक बचेआ हा ते में खिट्ट मारियै सिद्धी

7 तुरसें गी दरसन आयां किन्नी डाहडी पेई ऐ मार  
साहबें दा कु'न दुश्मन बनेआं जिन्नै कीता बार  
आहल्ली पैहला चुप्प निहा कीता, दूआ टैहलिया आया  
उंनै बी बिन साह लैते दे किस्सा कचा सनाया—

बदलोखे गासै थमां सैहबन डिग्गी रब्बी बिजली  
सब भिड्डे गी राख बनाया पही बी ओह नेई हिसली  
सारे नोकर जले फकोए, तिड़के उं'दे पिंजर  
सब किश सत्यानास होई गोआ बची नेई इक बी फींगर ।

इच्चरै च इक ढोंदा—ढठदा होर टैहलिया आया  
उन्नै आइयै सैहमें—सैहमें बाकी कच्च सनाया—  
चुप्प चपीते, छुपलें पैहरें, पच्छुआं डाकू आए  
इक्कै हमलै कन्नै सब सखा न ठकानै लाए

दिखदे—दिखदे खिद्धी—खिद्धी ऊट लेई गो सारे  
जि'यां निम्बल रातीं छप्पन झटपट त्रुट दे तारे

एह गल्लां सब पूरियां होइयां मसां—मसां फही जेल्लै  
इक बड्डे पुत्तरै दा नोकर बौहड़ेआ उस्सै बेल्लै

सारे तुं दे धियां पुत्तर खा करदे हे धाम्मां  
इच्चर व्हा—बलूना आया नाश ते केहर बरहामां

अकख झपकदे कुप्पड़ मैहल उस कीता फीगंर—फीगंर  
भसम होई गे मलबे थल्लै तुन्दे धियां पुत्तर

8. जोब शेर दिल हा लेकन ओहदा दिल गेआ हिस्सी  
ओहदे कालजे दे टोटे होए, ते किरें सारै।  
ओहदा रोम-रोम होया साम-धाम मायूसी  
ओहदी शखसीयत दे खिल्लरी गे सिरें सारै

जोब सिर मुनाइयै, कप्पड़े फाड़ी ढाई मारै  
पुतरा खुब्बला सर पर मारदे पलशटे आक्खै—  
‘मिगी सब दित्ते दा, सभनें शा बड्डे सखीदारै  
वापस लेई गेआ हा, ओहदी जि‘यां मर्जी ऐ रक्खै

में अपनी मारु दी कुक्खा शा इत्थें नंगा आया हा  
ते वापस जंदे बेल्लै लाजमन में नंगे जाना ऐ  
अटूट एह असूल ऐ, मुंढा शा में स्रिष्टी दा  
मि‘म्मी बाकी जीव जन्तुएं आंहगर नभाना ऐं

एह गलाइयै, सिर नुआइयै, उस अरदास कीती ही  
तूं ओह लेई गेआ ऐं, जेहड़ी चीज तुऐं दित्ती ही

1. कड्डै सौ सौ घीसियां, करियै तोबा-तोबा  
अलखुदा असीम ऐ ते माहनु रेशम कोबा ॥  
माहनू रेशम कोबा ऐ हद्धें बिच बद्धा ।  
स्रिश्टी भेत नेई समझी सकदा एह छुटकद्धा ॥  
जोब दै आंहगर अल्लाह अगगें झोल्ली अड्डै ।  
मन्नौ ओहदी मेहर ते सौ-सौ घीसियां कड्डै ॥

9.फही मुड़ियै अल्लाह् दै दरबार देवी—देवते आए  
ते उ'दै कन्नोकन्नी भुड़कदा शतान बी आया  
देवी—देवतें गुणगान अल्लाह् ताल्ला दे गाए  
ते अल्लाह्—ताल्ला नैं शतानै गी एह् पुच्छाना लाया

“तूं कुत्थूं आयां ऐं?” शतानै फौरन परता दित्ता एह्  
“ में सारी गाही आयां, कुत्ती ते भलकेरमी दुनियां,  
दगावाजन ते झूठी पेरनी—तुसेंगी दस्सां केह्—  
एह् किन्नी कुत्ती जात ऐ दमाग फेरमी दुनियां?”

खुदा ने आकखेआ पर जोब भगत पक्का ऐ मेरा  
सुखें च बी, दुखें च बी ओह् मिक्की याद करदा ऐ  
इन्नां प्रेम करदा ऐ जे आकखो सक्का ऐ मेरा  
ओह् मेरा नांऽ लेइयै मेशी जिन्दाबाद करदा ऐ

मेरै खलाफ ओह्दै पल्लै कोई तर्क नेई पौंदा  
ओह्दी भगती ते श्रद्धा च रत्ती फर्क नेई पौंदा!



10. तूं मेरी छत्तर छाया चा उसी कड्डी लेआ ता'म्मी  
मिक्की अपनियें बदनखियें दा दोस नेई दित्ता  
जिमीं जैदाद टब्बर तूं ओहदा भसमेआ ता'म्मी  
अपने आपै गी मेरे शा सुबकदोश नेई कीता

बेदोसे माहनुआं गी कश्ट खंजर खोहबेआ ऐ तूं  
प उसदी स्थिर प्रगयता गी बिलकुल ल्हाई नेई सकेआ  
उ'दे रसूख, ईन, ऊरमा गी डोबेआ ऐ तूं  
उ'दे सुआतमा गी झूरें च पलचाई नेई सकेआ

जदूं अमीर हा ओह तां बी मेरी पूजा करदा ऐ  
हून गरीब ऐ ओह फही बी मेरी पूजा करदा ऐ  
औतर होने शा पैहलै बी ओह मेरा गै बंदा हा  
औतर होने दै परैत्त बी ओह मेरा गै बंदा ऐ

सारी स्रिष्टी अंदर जोब जैसा बंदा नेई कोई  
उ'दे मकाबले च आवै ऐसा बंदा नेई कोई ।

11.शतानै हरिसयै, अल्लाह दै कन्नै तरकान लाया  
दुनियां च भाएं माहनू गी अपनी किंद प्यारी ऐ  
जिमीं जैदाद, डंगर बैहतर ते बाकी दा सरमाया—  
प सभने कोला माहनुआं गी अपनी जिंद प्यारी ऐ

ओह सेहतमंद नेई होऐ तां अपनी सेहतमंदी तै  
जिमीं जैदाद—पैसा—धेल्ला सब किश लाई दिंदा ऐ  
अपनी लागरी ताईं शरीरी जिल्द बंदी तै  
फही दौलत सारी दी सारी गै ओह मुहाई दिंदा ऐ

चमड़ी पर धरीटै कन्नै उसगी किश निसो होंदा  
प जे कोई हड्ड—मास ओहदा आइयै त्रोडग ते बड्डग  
तां अरड़ां मारियां पैहलैं ओह ओहदें घोलें ऐ पौंदा  
ते पिच्छुं मुहां उप्पर उसगी सैंखां गालियां कड्डग

मुट्टी साम्भियें गी लौहका हाड़ रोढी नेई सकदा  
कफैदा सिर्फ दुनियावी इ'नें गी त्रोड़ी नेई सकदा ।

12. अल्लाह नैं शतानै गी गलाया— चल तेरी मन्नी  
तूं जो करना करी लै— सिर्फ ओहदी जान नेई लैयां  
खलूस जोब दा मेरे गित्तै तूं सकदा नेई मन्नी  
टिल्ल लाई लै पूरी— प ओहदे प्राण नेई लैयां

कुसै सूरत बी ओह मेरै खलाफ बोल नेई बोलग  
अटूट जोब दी भगती प एह विश्वास ऐ मेरा  
ते गप्फे भामें सारी दुनियां बरखलाफ ओह तोलग  
प मेरी पूजा करदा रौहग जोब दास ऐ मेरा

उ'दा करदार केहरा नेई, दोहरा ऐ, त्रेहरा ऐ—  
उ'दे अकीदे बिच लेशमात्तर खुट्ट हैन्नी सो  
उ'दे अकीदे दी जसामत दा जुस्सा बडेरा ऐ  
उ'दे आंहगर अकीदत होरसी अनटूट हैन्नी सो,

उदी चमड़ी दर्होड़ी ओड़े आं ते कोरड़े लायां  
पर उसगी दर्द रोग छब्ब जसमानी छड़े लायां

13. एहदैं बाद शतानै, जोब गी बत्थेरे लाए  
चौबी घँटे ओह हा करदा होंदा हाय-हाय  
गिट्टे कोला बोद्दी तिक्कर परक-भ्रोचे फोड़े  
इन्द्रियें दे द्वारें उप्पर लुडे जमाई ओड़े

ठीकरियें नैं रगड़ी- रगड़ी पीप चोआंदा जोब  
अन्सैहनी पीड़ें कारण-रोंदा करलांदा जोब  
धरती दी तत्ती भुब्बल गी जखमें उप्पर मलदा  
जो शतानै दित्ती उसगी पीड़ा रेहा ओह झलदा

इक दिन ओहदी त्रीमत बोल्ली-कुत्थें ऐ ओह अल्लाह ?  
अट्टै पैहर हा रब्दा अल्लाह-अल्लाह- खैहरत सल्ला-  
किश बी तेरी मदद नेई कीती सुनियै तेरे वैन  
आक्खो तेरा इश्ट नेई ऐ-एह कोई सत्तर फैन

छोड़ अकीदत, लगन खलूसी, इंदा खैहड़ा छोड़  
कड्ड गालियां, ओहदैं कन्नै अपना नाता त्रोड़ ।

14. पीड़ें दी चिंड़ें थमां हारी देई दे अपनी जान  
मिगी रंडापा सिरमत्थै पर त्याग तूं अपने प्राण ।  
लेकन जोब ने परता दिता— नार ऐं तूं बेअकली  
अल्लाह—ताहला गी दिखनी ऐं म्हेशां गै इकशकली

एह अल्लाह दा हक्क ऐ दिंदा कदें—कदें बदहाली  
दुख—सुख, कश्ट ते पीड़ा बी ते दिंदा कदें—कदें सदहाली  
इस म्हेशां रटनां अल्लाह—अल्लाह खैहरत सल्ला  
अल्लाह दे कम्म कोई नेई जान्ने उ'ऐ जान्ने कल्ला

सच्चे भगत नेई जरकदे भामें दुख तड़फान  
इश्ट ध्यानं लग्गियै जींदे बांहग चट्टान  
जींदे बांहग चट्टान, दिलै बिच्च पाइयै इश्ट  
इश्टै कन्नै होंदा बंधन बड़ा घनिश्ट

इश्टै बारै बोल नेई बोलन कदें बी कच्चे  
भगत खुदा दे होंदे न ऐसे गै सच्चे ।

15. सखी जोब दे दोस्त हे त्रै सच्चे, चारा साज़ ते गमगुसार ओहदे  
ऐलीफाज, बिलदाद ते जोफर त्रैवे, चंगे-मंदे च हे राज़दार ओहदे  
सुनी जोब दा कश्ट ते आवजारी, किट्टे होए ते चली पे जोब पाससै  
तां जे उसी ओह् दम दलासे देन, ओह्दे गमें गी बंडने दी सोहल आसै

जेल्लै दूरा गै तड़फदा जोब लभबा-उ'नें पैहलें तें उसी पछानेआं निं  
उ'दे लिस्से ते लागर मुहांदरे गी दिक्खी त्रौन्नं गै उसी पछानेआं निं  
पर सुनियै जोब दी अरडें गी उ'नें ओह्दी गलानी पछानी लैती  
ओह्दा मंदडा-मांदडा-लुडजीना ते जनौरमी हालत ही जान्नी लैती

एह जान्णियै उ'नें बरलाप कीता, ते अपने कप्पड़े फाड़ी लैते  
सिर मुब्बलै दै कन्नै भरी लैते, दिल जोब दे भावै च साढ़ी लैते  
पही जोब दै लाग्गै ओह् आई बैठै, इक हफता उत्थें गै बैठे दे रेह  
किश बोल्लेआ नेई, किश आवखेआ नेई, मौन मूरतां बनियै बैठे दे रेह

उन्नै विजन इमदादा दै गै तरनी वेतरनी ऐ ।  
शताना, इस स्तेहानै च तूं भलेआं हारी जाना ऐ ।

2... हद्ध शा बाद्ध पीड़ होऐ जिंदा होऐ निं कोई इलाज ।

उस बेल्लै जेहड़े औंदे न उसे पीडू दे हमराज ॥

पीडू दे हमराज तो आइयै चुप्प न रौंहदे ।

लफज बड़े मोहताज, तां मुहां किश नेई कूंदे ॥

नजरें—नजरें कूंदे करियै बोलचाल सब रद्द ।

अन्हद् पीड़े दी होंदी नेई जिस बेल्लै कोई बी हद्द ॥

16. चुप्प दिक्खियै उ'नें गी जोब बोल्लेआ आखर  
अपने जम्मने गी अभिशाप आक्खियै भैड़ा  
स्त्रिष्टी चा म्हेसी जा मेरे जम्मने दा हर अक्खर  
जिस रातीं में जम्मेआ हा ओह्दा मुक्की जा खैहड़ा

कीजे ओस रातीं अ'ऊं इस दुनिया च आया हा  
उस रातीं दा दिन निं आवै एह् फरयाद ऐ मेरी  
उस रातीं दा झुसमुसा होऐ बिन तारें दै न्हेरा  
कबत्ती रात ऐ ओह् कीजे ओह् रूदाद ऐ मेरी

ओह् रात होई जा फम्बड़ ते वक्तै बिच्चा निकली जा  
मेरी मारु दी कुक्खै दे की दरवाजे खोहल्ले उस ।

ओह्की रातै दे मम्बे दा सारा चेता भुल्ली जा  
नारसैं बिच्च फूक मारियै की सुआस डोहल्ले उस

कोई म्हेसी ओड़ो कलच्छनी उस भैड़ी रातै गी  
उसी गै निं, मस्हाओ ओस दे चेते दी जातै गी



17.में जमदे गै मरी गोआ निं की, में जम्मेआ कैहल्ली?  
समेत जेरै दै गोड्डें मझाटै की टुरी आया?  
ते मेरे चुंगने ताई ओह सीर मम्मं दी पैहली?  
की फुट्टी पेई ही, कैहल्ली में उसगी मुहां च पाया?

में की नेई जाई रलेआ मोए—मरे दे राजबाडें च?  
मेरे हड्डु की दबोए निं बच्चें दी कबरें च?  
की नेई सुट्टेआ मीं सुन्नी दहडें जां जाडें च?  
की नेई डोब्बी ओड़ेआ मिगी अत डूंहगी डबरें च?

कीजे लोथें गी किज पीडें दा एहसास नेई होंदा,  
शतानें गी शतानी करने दी किज लोड नेई पौंदी ।  
. हुट्टे—हारें दी ईनें दा सत्यानास नेई होंदा  
कसरी रूहें दी कुत्ता—फज़ीती होर नेई होंदी ।

मरने बाद माहनू अल्लाह दी खढाल नेई रौंहदा ।  
लोथें दा कदें बी मेरै आंहगर हाल नेई होंदा ।

18.दुर्गत आतमें दे साह—घड़ोलू डु'ल्लदे निं कैहल्ली  
कसैली कौड़तन दे भंभे, छुबे कैहली निं सुकदे  
वफात मंग्गने आहल्लें दे प्राण जुलदे निं कैहल्ली  
ते जिसमें—खाकी दे घनेरे छौरे कैहल्ली निं मुकदे

में जोब आं, में अल्लाह दा भगत आं, पही कैहल्ली अल्लाह नें  
मेरी बत्तें गी न्हेरा—मन्हेरा कीते दा इन्नां?  
मीं समझ आवै नेई रत्ती जे कहल्ली मेरे मौल्ला नें  
कसाईयें आंहगर जीन खीन मेरा कीते दा इन्नां?

मरी जां में जे इस्सै पल तां थ्होग पीड़ें शा मुक्ती  
घड़ी एह्ह होग माफक यारें तैं जशन मनाने दी  
इ'दे शा चंगी नेई लब्भै दी मिक्की मुक्ती दी युक्तीं  
मिक्की जातना दे जफर—जालै शा छुड़ाने दी

मिक्की चुक्की लै, पीड़ें दा हफ—तड़पफा मुक्की जा ।  
इ'नें असारमी पीड़ें दा जक्कर जप्फा झुड़की जा!

3. दुख होऐ असारमां, पीड़ होऐ बेजोड़  
बड्डे-बड्डे सूरमें दे द्रिड़ै गी छोड़ै त्रोड़ ॥  
द्रिड़ै गी छोड़ै त्रोड़- जिरड़े अरड़ां- मारन ।  
जीन नीत नेई जान नीत गी मिथन बचारन ॥  
मौती बल्ल गै होंदा ऐ उस बेल्लै मानस रूख ।  
अनहद पीड़ होऐ जिस बेल्लै अनस्हारमां दुख ॥

19.अपने दोस्तै दा रोन—तड़फन दिक्खियै “ऐलिफाज़”  
रन्हाका होई करी आक्खन लगा—” किश आक्खन नेई होंदा  
सुख दुख बंडना ऐ सौखा पर एह् दर्द लाइलाज  
कोढ़ जीन —नर्क दोज़ तेरा बंडन नेई होंदा ।

में किश आक्खां तां ओह् शायद तुगी चंगा नेई लग्गै  
अवो, आक्खे बगैर बी मेरे शा रौहन नेई होंदा  
कदीमी सच्च ऐ एह् भामें तिंजो चंगगा नेई लग्गै  
व्हा जे राहो तां फसल ऐ व्हा वलूनें दा थ्होंदा

मिगी पता ऐ तूं अनगिनत लोकें दा भला कीता  
किरस कीती नेई कुसैगी सिक्खमत्त देने च—  
पैसा—धेल्ला देने च कदें नेई लाग—लाह् कीता  
कसर रक्खी नेई भुक्खें गी दाल—भत्त देने च

तूं अनगिन डिग्गने आहल्लें गी थम्मियै बचाया ऐ  
तूं अनगिन लागर गोड्डें गी बड़ा तगड़ा बनाया ऐ ।

20 गलांदा हा तूं लोकें गी भ्राओ हिम्मत नेई हारो  
इलाज मुश्कलें दा सिर्फ जरनीकी सुभाऽ होंदा  
संजम बरतिये नेई जेक मसीबतां स्हारो  
तां अपना गै बुरा होंदा तां अपना गै बुरा होंदा ।

अवो, हून अपनै तन लगगी तां कैहल्ली बेसबर बनेआं ?  
कैहल्ली मुशकलै बिच्च जी हताश करना ऐ इन्नां?  
मसीबत नै भांए जुस्से गी छलनी कीता ऐ भलेआं  
पता, हून लगगना ऐ तेरै कोल संजम ऐ किन्ना?

सुनेदा ऐ मसूमें गी खुदा पीड़ां ते दिंदा ऐ  
अवो संजीवनी होंदी ऐ उं'दी पीड़ दी, श्रृद्धा  
तेरी खुदा प्रस्ती दा कवच तुगी सखींदा ऐ  
तेरी ईमानदारी दा मुकम्मल कायल ऐ अल्लाह ।

पही कहैल्ली तूं एह कैकोरौला करलद्ध पाए दा ?  
सखी सुआतमी तबा मखालफ बद्ध पाए दा ।

21 तेरी कथनी ते करनी बिच्च इन्नां फर्क की आया ?  
तेरी शखसीयत बिच्च की नेही तन्नजली आई ?  
तूं दुएं गी ते संजम बरतने दा तौर समझाया,  
प अपने बारी कन्न फाड़, रोदन—रागनी ऐ लाई ।

जो करदा ऐ सो भरदा ऐ अलाई निजम ऐ पक्का,  
खुदा दे रोह—विसफोटै च सब फकोई जंदे न,  
ईमान परवरी दा निजम पालन नेई करै जोहका,  
उं दे घर बी घराहट बी तबाह् होई जंदे न,

जुआन शेर बी दंदाल—हीन होई जंदे न,  
भुक्खे—भाने तगड़े शेर गी शकार नेई थ्होंदा,  
भुक्खी शेरनियें दे नैन बी पथरोई जंदे न,  
प नज़री गोचर चम्म बी निसो खाने गित्तै होंदा ।

उं दे बच्चड़ें दे संघे भलेआं सुक्की जंदे न,  
बिजिन मास्सै, बिजिन दुद्धै, मरोई मुक्की जंदे न ।

22. इक दिन ईश्वर वाणी मिगी सनोची सैहबन गै,  
डूंहगी नींदरा च होन सब नचूक सुत्ते दे,  
एह चानक चक्षुरिन्द्रियें च ओड़क भान एह आवै,  
प्रेत आई करी सरहैनै ब'ल्ल न खड़ोते दे,

धाक्का मीं बड़ा लगगा मेरा पिंजर गोआ तुल्ली,  
मेरे जिसमा उप्पर सारे गै सरकंठे उब्भारी गे,  
मेरी गल्लें उप्पर सूखमी फलाकड़ी झुल्ली,  
डरै मूजब मिगी लगगा जे मेरे प्राण निकली गे ।

में लेटे दा रेहा बिन हिल्ले—डु'ल्ले घेसला बनियै,  
मगर मीं सैहबन अंदर आए दे ओ प्रेत नेई लब्भे ।  
में अक्ख खोहल्लियै मास्सा ते डाम मरने दा करियै  
उनें गी दिक्खना चाहया ताहमीं प्रभेत नेई लब्भे

अवो इस शशो पंजै च मिगी अवाज इक सुनची  
अवाज साफ—रोहबदार ही स्पष्ट सौ गुणची ।

23. फानी आदमी क्या ईश्वर गी पुच्छी सकदा ऐ?  
उ'दा इन्साफ कुत्थें ऐ ते धर्मी कु'न ऐ ओहदे जन ?  
उ'दे जन कु'न पकीजगी दी रोशनी च मकदा ऐ ?  
सुआल कु'न करी सकदा ऐ अल्लाह गी एह शोहदे जन ?

अल्लाह गी ते अपनं सेवकें दा बी वसाह हैन्नी,  
सारे देवी देवतें दा ओह इम्तेहान लैंदा ऐ,  
फरिश्तें गी बी ओहदे सामनै बोल्ली अताऽ हैन्नी,  
ओह सारे ऐहलकारें दे सखत बे आन लैंदा ऐ।

फिरी इन्सान दी औकात केह ऐ जे उसी आकखै,  
तेरा इन्साफ केह ऐ? माहनू ते ऐ मित्ती दा पुतला,  
ओह जींदा ऐ जदूं तक ईश्वर जींदा उसी रक्खै ,  
एह पंजे तत्तें दा पुतला ते त्र'अं बोधें दा बुतला।

सवेर-सं'जां गिनदे-गिनदे गै एह पूरा होई जंदा  
बिजन मतलब, बिजन वोधें दै चूरा-चूरा होई जंदा।



24. मित्ती दे घरें इच रौहने आहले, जिंदियां नीहां  
मित्ती दी गै छिछली डूंहगै बिच, होंदियां कायम,  
खुदाबंदे दी करनियें गी घोखी सकदे न कि'यां ?  
करी सकदे न कि'यां हीखी— इंदे होने दी कायम?

जली जंदे न जेहड़े शामीं इक पतंगे दै आंहगर,  
ताहन्ग अमरता दी पाली रखदे न मनें अंदर,  
तलाऽ बिच्च अपने सिंग दिक्खी, बारांसिंगे दै आंहगर,  
सरूपै दी तंडिंग ब्हाली रखदे न मनें अंदर ।

मनुक्ख जमदा ऐ, जींदा ऐ ते पही मुक्की जंदा ऐ,  
खुदाई खिन दे अनगिन करोड़में हिस्से थमां लौहका,  
उ'दा एह जीवनकाल होंदा ऐ, ओह उक्की जंदा ऐ,  
हिरख मनुक्खी जीवनै गी समझने दा आखरी मौका ।

अपने लौहके— लौहके बोध नुकतें पर अटल रौहदा—  
खुदा गी जान्ने—पनछान्ने बिजन म्हेशां जटल रौहंदा ।

25. बड़े बारी तुसें दिक्खे दा, मूढ़ें गी सुफल होंदे  
अवो इं'दा सुफल होना छड़ा वकती चरज होंदा  
इं'दे कोड़में गी चिर निसो लगदा विफल होंदे,  
गलीज संस्कारें कारण एह् इंदा हरज होंदा ,

कलेश मूर्खों गी पौंदे सट्ट मारी दिंदा ऐ—  
कब्बली ईरखा सुधें गी निग्गोसार करदी ऐ,  
अल्लाह् माहनु गी हमेशा दुक्ख भारी दिंदा ऐ—  
उसी मसीबतें कन्नै सदा दो चार करदा ऐ

कलेश मित्ती चा निं निकलदे, जिमीं च नेई उगदे  
कलेश जिंदगानी दा गै इक अटूट हिस्सा न  
कलेश भंडने आहल्ले निं जीन खेढैच पुग्गदे  
कलेश जिंदगी दा हेठ—उप्पर—आगा—पिच्छा न

कोई निं पुश्त—पनाह् दिंदा, छंदे करियै भाएं मंगो  
सब तसवीशां जरियै चंगा जीने दी तमांह मंगो ।

26. खुदा दा नांऽ जपियै फ़ैसले सब ओहदे प छोड़ो,  
कीजे उ'ऐ लागर रूहें गी त्रान दिंदा ऐ ,  
रिश्ता ओहदे कन्नेँ खज्जल खारियें च नेई त्रोड़ो,  
उ'ऐ मौत दिंदा ऐ ते उ'ऐ जान दिंदा ऐ ।

सोगसारें दे छंदे गी ओह तसलीम करदा ऐ,  
मते चलाकड़े लोकें गी मित्ती दोज़ करदा ऐ,  
धूरत-कपटि मनसूबें गी लिंदे-ल्हीम करदा ऐ,  
करिशमें एह खुदावंद रोज़-हां-हर रोज़ करदा ऐ ।

जरूरतमंद भगतें गी ओह- सारें शा बचांदा ऐ,  
जोराबर-धूरत कपटियें गी ओह मित्ति चटांदा ऐ,  
तां गै निरधन मनें च मेद फुरदी रौहदी ऐ-  
ते ना इन्साफी मूक जीहबा उप्पर दंद रखदी ऐ ।

तां गै गाहे-गाहे-जीवन-रौंस टुरदी रौहन्दी ऐ  
तां गै जिन्दगी मौती दा मुड़कु ब'न्नी रखदी ऐ ।

27. खुदा सिर्फ अपने भागतें गी तकलीफ दिंदा ऐ,  
उं'दा सबर सीर ते तसीर दिक्खनें ताई,  
उं'नें गी गैई—गैई उप्पर सौ हरीफ दिंदा ऐ—  
उं'दी हाजतमंदी ते जकीन परखने ताई,

सर्व शक्तिमान जद कुसैगी शुद्ध करदा ऐ,  
उसी मकरुज होना चाहिदा ऐ अल्लाह दा फौरन,  
कीजे अल्लाह अपने हेरुएं दी सुध रखदा ऐ,  
उं'दे भाग लगदे न, फही करियै ए बड़े सौरन ।

अपने हत्थें जखम दिंदा ऐ आपें भलांदा ऐ,  
कुसै होरस गी कोई सगमी सट्टा लान नेई दिंदा,  
ओह जोहके भगतें गी अति थमां मता गै चांहदा ऐ,  
उं'दे जीने च कुसैगी हत्थ पान नेई दिंदा ।

कोई शमशीर ओहदा सोहल जुस्सा बड्डी नेई सकदी  
कोई अकाली हालत ओहदी जान कड्डी नेई सकदी ।

28. खुदा दा आसरमां लेइयै एह गल्ल पक्क होंदी ऐ,  
जिमीं जरखेज होंदी ऐ जनौर दोस्त बनदे न,  
सलामत रौहदा ऐ घर कुल्ला, सालम रक्ख रौहदी ऐ,  
टब्बर टोर रौहदे राजी बाजी बनदे—ठनदे न,

खुदा दी मेहर जे होऐ तां बंश बधदा रौहदा ऐ,  
मवेशी फम्बड़ नेई होंदे ते कौल खाल्ली नेई होंदे,  
जेहड़ा अल्लाह ताहल्ला दा गै नांऽ जपदा रौहदा ऐ,  
उ'दे दुरेड़े रिश्तेदार बी फंगताली नेई होंदे ।

एह सब जाचे परखे दा ऐ, जोब, सच्च ऐ भलेआं,  
मनुक्खी हक्क नेई अल्लाह दी करनी पर जिरा करना,  
एह तूं कीता ऐ प अगगें आस्तै नेई एह करेआं,  
एह ओहदी मर्जी ऐ कुसै दा चंगा जां बुरा करना ।

मनुक्खी फर्ज ऐ अल्लाह दा शुक्रिया सदा करना ।  
अपनी जिंदगी दा हर इक पैहलु पार सा करना ।

29. 'जोब' दंग 'एलीफाज़' दियां मंतकां सुनियै—  
उस गलाया, यार—बेलियें गी शोभा नेई दिंदा,  
कलेशें "च ग्रस्त यारें" गी हदायतां देइयै,  
उसकी ओहदी अपनी नज़रें च करी ओड़ना नींदा ।

यारें बेल्लियें दा कम्म ऐ हमदर्दियां करना—  
तिफल तसल्लियां गै सेही पर तसल्लियां देना—  
ओहदे कोल बेहिये डुसकना फसरदगियां करनां—  
ते मेदवार खबरी सब भविक्खै ब'ल्लियों देना ।

मेरे कलेशै दे भारै गी पैह्लें तोल्लियै दिक्खो,  
मेरी विपतें गी रक्खो हां धरम त्रक्कड़ी उप्पर,  
मिगी तुस करुणामई जज़बाती पक्खी झोल्लिये दिक्खो  
मिगी तोल्लो निं छड़ा सगमीं कण त्रक्कड़ी उप्पर ।

फिरी समझगेओ तुस मेरी विपतें दी हदें गी ।  
फिरी गै जानगेओ तुस कलेशें दी लदें गी ।

30. दुनियां दे समुंदरें दै कंठे लेत्तर ऐ जिन्ना,  
मेरा कलेश ऐ, उस सारे लेत्तरै थमां भारा,  
मेरी गलानी च तां गै कबत्तापन ऐ इन्ना,  
ओह् खौहरा कर्कस ऐ ते हड्डे शा बी बाद्धू ऐ खारा ।

मेरे खाकी जिसमै च अलाई तीर खु'ब्बी दे,  
ते मेरी रुह उ'नें तीरें दा जैहर सीकै करदी ऐ,  
शमानी त्रासदी दी सपनी देन दंद चुब्बे दे—  
ओह् सपनी उ'दै राहें मेरी रत्त डीकै करदी ऐ ।

होऐ जदू धाड़ तां हो आंकदा नेई जांगली खोता,  
लून पाइयै गै सलूना ऐ सुआदला बनदा,  
तमाशबीनें दा दिल हरदा ऐ नजूमी दा तोता,  
प सोटी शा डरी करियै गै दबी खेढा करदा ऐ ।

मेरा शरीर हड्ड—मास ऐ पित्तल जी पत्थर नेई,  
में संजम की करां जीदे जी मीं अराम जिच्चर नेई ।

31 मेरी अरदास इन्नी हारी ऐ जे ईश्वर आपें,  
मेहरबानी करियै चिंदी-चिंदी मीं करी ओड़ै,  
मिगी ऐ बदहवास कीते दा पीड़ें ते संतापें,  
मेरै कन्नै चिंदी-चिंदी, इंदी बी करी ओड़ै ।

में खाकसार आं ओह इन्नी कुधारस बंधाऽ मेरी,  
लक्खां घीसियां कढगा में तां उसगी नमन करियै,  
सुनी लै अल्लाह ताहल्ला इन्नी कु जेकर दुआ मेरी,  
में पीड़ा पापी जाहगा, हसदे-हसदे आचमन करियै ।

बंदा परवरै दे पाक बाकें पर अमल करदे,  
में बेध्यानी च बी नेई कदें अवगगेआं कीती,  
में सारे कम्म कीते न उ'दे कैहरा थमां डरदे,  
उ'दी नभाई ऐ में पूरी चाल्ली हर धरम नीति ।

में छंदे करना जे ओह मेरियां किरचां डोआई ओड़ै,  
इस अल्लारासी गी पीड़ें थमां मुक्ति दोआई ओड़ै ।



32. अज्ज भाखाशें भाखशी ऐ ते आगी की?

जफाकश 'जोब' कन्नै की करा करदे जफावाशी?  
दस्सो, तुं'दे कोला में कदें किश डाल्ली ऐ मंगी?  
जां तुं'दै कन्नै कीति ऐ कोई बरतून इकपास्सी?

कदें जां आक्खेआ फिरौती देइयै मिक्की छड़काओ,  
अपने भांडे टींडे बेचियै बचाऽ करो मेरा?  
नशावर मेरै उप्पर अपनी जान बी करी जाओ,  
जां अपना भुल्लियै तुस अज्ज पूरा लाह करो मेरा ।

जां संकट मेरा दिक्खियै तुसंगी डर ऐ लग्गै दा,  
अपनी बद्-देआनतिएं बारे सोची-सोचियै ?  
जां खौफ हशर दे दिना दा ऐ तुसें गी डंगै दा?  
माजी दी कच्चजी नीतें दे चेतें खरोचियै ?

की तुस मेरै ब'ल्ल दिखदे निं? की मूंह ओ मोडै दे?  
मेरा साथ इस संकट घड़ी च की ओ छोडै दे ?

33. हे जेहड़े पक्के सकड़े भ्रांए दै आंहगर  
ओह जेल्लै सज्जनता, क्यास, तरस त्रोड़ी दिंदे न  
बनी जंदे न सुक्के मोसमी दरेआएं दै आंहगर  
ते पनेआसी बी उत्थे औना—जाना छोड़ी दिंदे न।

रस्ते छोड़िये पुराने यार—बोल्लियें दे ओह,  
रेबड़ भिडुं दे जाड़ै दै ब'ल्ल मोड़ी लैन्दे न,  
रौंहदी ऐ उ'नेंगी पीने आहल्ले पानिया दी टोह,  
जीभां सुक्के ओठें उप्पर अपनियां पलेंदे न।

जेहड़े रुख दिक्खियै ब्हाऊ दा चलदे न ही बीवें च,  
उ'नें गी पानी नेई थ्हांदा कुदै पाससै बी जाड़ें च,  
ओह सारै भड़कदे न पानिया तैं टोहें—टिब्बें च,  
उ'नेंगी मदद नेई थ्हांदी कोई मंदे ध्याड़ें च।

हरासां जान्नियै मीं टाहे—टिस्से की ओ ला करदे?  
मिगी पत्याने तैं अनर्गल किस्से की ओ ला करदे?

34. चंगा—हाल, मंदे हाल दिक्खियै पसोंदा ऐ,  
नजर सुटदा ऐ मंदे हालै उप्पर सत्ता तरफैनी,  
प पुर जकीन मी खुशहाली गी पता निं होंदा ऐ,  
जे अक्ख झपकदे गै कश रौहना कक्ख बी हैन्नी।

मेरे मित्तर खोओने आहल्ले ओ तुस नजरां नेई फेरो,  
मेरै ब'ल्ल दिक्खो, मिक्की दरसो केह कसूर ऐ मेरा,  
मिगी समझाओ फलसफें दै कन्नें मिक्की निं घेरो,  
जे कैहल्ली सारा सरवस्सब गै चकनाचूर ऐ मेरा,

में झूठ बोल्लेआ नेई, कसम ऐ मी अल्लाह ताहल्ला दी,  
मेरी दोश—मुक्ति पैतरे उप्पर ऐ लग्गी दी।,  
केह मीं मेरी बदकलामी ऐ फूकै, बुआल्ला दी,  
अलाही बंकनाल हिस्सलन निं देऐ दी अग्गी गी!

मेरे पर होंदे अत्याचारें गी अलाही नेई आक्खो,  
शतानी कर्म—करतूतें गी रब्बी फाही नेई आक्खो।

4. सच्चे मित्तर ओह होंदे न, करन निं भाएं ककख ।  
पर ओकखी घड़ियें मोकै निं फेरन अपनी अकख ॥  
निं फेरन अपनी अकख ते देन सिक्खां मत्तां ।  
हमददीं दे कन्नें करिये पदरियां बत्तां ॥  
फाहें फसे दे यारें गी समझन नेई बच्चे ।  
जीभें पीड़ घटान ओह होंदे सच्चे मित्तर ॥

35. धरतीपर मनुकखी जिंदगी दुशवार होंदी ऐ,  
बसाऐं गी छामां गी हमेशां तुप्दी रोहन्दी ऐ,  
मजूरें आंहगर तरकाले जदूं मज़दूरी थ्होंदी ऐ,  
तां दाल-रुट्टी थ्होंदी ऐ नितानां-जिंद खपदी रौहदी ऐ।

मेरे दिन सकखनें निं देई न सब मेरियां रातां,  
मेरा लेटदे गै उट्टने गी मन करी जन्दा,  
ते सारी रातां दे न पलेशटे ते दुखदियां लत्तां,  
ते बडलै झुसमुसा होंदे गै होर मन डरी जंदा।

मेरे चम्मै दी मैलू च लुडे सुलकदे रौहदे,  
मेरा चम्म बिलकुल आकड़ियै उकड़ी जंदा,  
दिनै दे पल जुलाही ठरकी आंहगर रुलकदे रौहदे,  
नमदे शामीं तगरां सुक्कियै दिन सुकड़ी जंदा।

सवेरा-शाम करदे अक्की-पक्की जंदा दिल मेरा,  
निरअर्थक बैहस -मुबाहसें च मुक्की जंदा दिन मेरा।

36. हे परमेश्वर! इक साही ऐ एह जिंदगी मेरी,  
मेरी अक्खियें चंगेआई निसो दिक्खनी मुड़ियै,  
तेरे दिखदे गै में लानी अनमुक्कमी फेरी,  
कोई परतोंदा निं नकें दी न्हेरी कुंज्जड़ें दुड़ियै।

नमीं सुकदे गै बदल जि'यां लोप होई ऐ जंदा,  
में साह मुकदे गै जहन्नम बदोश होई जाना ऐ,  
खलास होंदा ऐ गलाजतें शा नाला अत गंधा,  
में पीड़ां उ'आं पीड़ें गी रूपोश होई जाना ऐ।

में चुप्प रौहन्नां निं फडियै में ढाई मारियै गिला करना,  
ते अपने आतमी संतापै मुजुं मारनियां अरड़ां,  
में हर अन्याय दै खलाफ ओड़क बलबला करना,  
समें नै मुद्दतें तगर निं एह बसारनियां अरड़ां

मेरे नाले सुनी सुनियै शमान हिल्ली जाना ऐ,  
मेरी गमगीनियें मूजब एह ज्हान हिल्ली जाना ऐ।

37. अ'ऊं समुंदर आं, जां अ'ऊं आं समुंदरी दानव?

जे तूं मिकी अपना शूल-नशाना बनाया ऐ,  
अराम मंगना तां मिकी घेरियै तूं हर जनाब,  
लुड़े गरीढ़े दा सुआदला खाना बनाया ऐ।

मीं अपनी जिंदगी बदबख्तमीं धिनौनी लगदी ऐ,  
मीं अपने आपै शा अनस्हारमी क्रैंक औंदी ऐ,  
मेरे नै जो होऐ करदी ऐ, मीं अनहोनी लगदी ऐ,  
मीं अपना जुस्सा दिक्खियै अमुक्की कैहन्क औंदी ऐ।

मिगी तुम्मी डरान्नां ऐं ते सुखने बी डरांदे न,  
में सोना चाहंदा निं सुत्तेबिना पर रेही निं सकदा,  
थकेमें मारमें सं'जां लै सौने तैं गलान्दे न,  
प दऊं घड़ियां बी में अरामै कन्नै सेई निं सकदा।

मनुक्खी जीवन ते होंदा ऐ सिर्फ घड़ियां-दो घड़ियां,  
प ऐसा जीन केह जेहदे च होन पीड़ां गै छड़ियां?

38.असँख लोक न दुनियां च हर इक मित्ती दी ढेरी,  
उ'नें असँखैं च इक में बी आं अदने थमां अदना,  
पही कैहल्ली मेरै ब'ल्ल गै पेई कोपी नज़र तेरी?  
मेरी रोज की अगन-परिक्खेआ तूं लैंदे जा करना?

की अनली कोप द्रिष्टी मेरे उप्परा हटांदा निं?  
कैहल्ली तड़फी- तड़फी मिक्की पल-पल कट्टना पौंदा?  
मिगी तूं दिक्खनां, पर में तुगी दिक्खी सखांदा निं-  
ताहियै रोज मिक्की अपना थुक्क चट्टना पौंदा,

झिश्टी दे राक्खेआ अगर में कोई पाप कीता ऐ-  
तां माफ करियै मीं उदारता कैहल्ली निं दरशांदा?  
मेरै चंफेरै तूं बंने दा पीड़े दा पलीता ऐ-  
मिगी फिता-फिता करने तैं अगग कैहल्ली निं लांदा?

मिगी जां माफ करियै मेरी जिन्दगी सोआरी दे!  
कसूर दस्सियै मेरा जां मिक्की जान्नु मारी दे!



39.अजें तक चुप्प हा "बिलदाद" डौर-भौर होए दा  
उ'नें दौन्नें दी तर्के गी ते गल्लें गी सुनै करदा,  
प हाल दिक्खियै हा अपने आपै दा कचोए दा,  
कदें सोचां बुनै करदे, कदें सिर हा धुनै करदा।

फही उन्नै "जोब" गी गलाया-किच्चर बोलदा रौहगा?  
तेरे रोंदू मकालमे कदूं तक बगदे रौहने न?  
तुगी किश समझ नेई औना तूं जिच्चर बोलदा रौहगा।  
तेरे गमगीन गप्फे व्हाऊ च बीलीन होन न।

तेरे आक्खे मुताबक अल्लाह नें अन्याए कीता ऐ-  
तेरे बच्चडें गी उस नें मुकाई दित्ता ऐ-  
तूं की नेई सोचदा जे उ'न्नै सिर्फ न्याय कीता ऐ-  
उ'नें गी कर्म दे फलें दी बाढी लाई दित्ता ऐ।

जो करदा ऐ ओह भरदा ऐ अपनी करनियें दा फल,  
अकट्ट, एह असूल कुदरतै दा होंदा निं अप्फल।

40. चंगा होग—अपने आपै गी अल्लाह हवालै कर,  
ओह ऐ सर्वशक्तिमान, ओह स्रिष्टी दा राक्खा ऐ,  
तेरे बेकसूर हाने दे तेरे सुआलै पर,  
न्यांऽ देग ओह निरपक्ख उसगी सब किश भाक्खा ऐ।

‘जोब’ चेतै कर जिस बेल्लै तुक्की होश आए हे,  
तूं किन्नां निगगोसार हा, तेरा ना घर हा ना कुल्ला,  
प ओहदा नांऽ जपिऐ, तेरै अंदर जोश आए हे,  
ते कि’यां दुनियां सामनै तूं आई खड़ोता हा कल्ला।

तेरी सच्ची खाकसारी बदलै यश थहोया हा,  
तेरी शुरुआत ही लौहकी प तुक्की मीरी थहोई ही,  
तूं सारे मशरका च सभनें शा अमीर होया हा,  
तेरा मरतबा उच्चा होआ ते पीरी थहोई ही ।

‘जोब’ चेतै कर एह सब ते उसगी घोख निं बिलकुल,  
तूं अपनी बदजुबानियें नै कर परोख निं बिलकुल।

41.जोब पुरखें दी एह मत्त तुक्की चेतै गै होनी  
जे पुरखें दे तजरबें गी निसो नकारना चंगा,  
उ'नें जो विरसे च दित्ती अकल, ओह् मन्ननी पौनी,  
उसी नेई सुआरथें बश भुल्लना बसारना चंगा ।

बगैर दलदलै दे नरकद बूहटे लग्गी निं सकदे  
बगैर पानिया दे मुश्कवत ते पनपदी हैन्नी,  
बगैर इं'दै, इं'दै उप्पर फुल्ल उग्गी निं सकदे,  
अगर उग्गी बी जान, जींदे एह् रौंहदे कदें हैन्नी ।

खुदा बी भुल्लने आह्लें दा हाल इ'यै होंदा ऐ,  
उ'ंदे औंकर भां फुटदे न पर बिलकुल मठोंदे निं,  
उ'ंदा सूरज चढ़ने कोला गै पैहले घरोंदा ऐ,  
ओह् पंध पाहें शा पही मोकले कदें बी होंदी निं ।

उ'ंदा गौह्—गमान ते भरोसा हुट्टी जंदा ऐ ।  
कच्चे धागे आंहगर उ'ंदा निश्चा त्रुट्टी जंदा ऐ ।

42. अल्ला दै बरुद्ध भौकने आहल्ले दा केह् दस्सां,  
बड़ा गै कच्चड़ा, लुड़ें सतुल्ल हाल होंदा ऐ,  
पीड़ें दे पछौकडुएं दै उप्पर लगादियां घास्सां,  
मरे बिजिन गै सौ बारी मनुक्ख ल्हाल होंदा ऐ,

केई बारी मनुक्ख जेल्लै मालामाल होई जंदा,  
“उदै भरोसै दुनियां चलदी ऐ”, एह गौह करदा ऐ,  
खुदा गी भुल्लियै , खुशहालियें उप्पर पसोंदा ऐ,  
तां अल्लाह ओहदियें अलगरजियें प रोह करदा ऐ

ओहदे बूहटें—बहटडें च सिनक लग्गी जंदी ऐ।  
ओह दे खेत्तरें च बौहड़दे न टिड्डियें दे दल,  
सिनक बूहटें गी जढे समेत चट्टी जंदी ऐ  
सारै टिड्डियें गै टिड्डियें दी होंदी ऐ चुलबल।

ओहदे मैहलें च लग्गी जंदे न गरड़जालें।  
निग्गोसार होई जंदे न ओहदे सब घरे आहल्ले।

43. बिच्च बहूचड़ियें तने दे मकड़जालै दै आंहगर,  
जनौर लंघी जा तां ताने सब बेकार होंदे न,  
छड़े ताने गै नेई मकड़ी-मकड़े बैठे दे अंदर,  
सने सब तानें-बानें दै मधोंदे न मरोंदे न,

खुदाबंद ऐ में जानी बेकसूरी मार नेई करदा,  
प खूब गाफलें गी धीड़दा-लताड़दा ऐ ओह,  
अतें गड़गील, लुच्चे, चुट्टें गी इक भेठा ऐ धरदा,  
जैहर गरल मकोड़ियें दी रुड्डें बिच्च बाड़दा ऐ ओह,

जेहड़े समझदे न उं'दै छुट्ट सिश्टी निं चलनी,  
उ'नें लोकें दे हड्डें कन्ने तूं डोटूड़ न कबरां,  
उ'नें लोकें थमां टप्पन कदें निं होनी बेजरनी  
ते उं'दी रुहें तें बेतरनी दियां डूहगियां डवरां।

अगर पछताएं तां ओह तेरा बेड़ा तारी सकदा ऐ।  
जि'दे भविक्खै गी मुड़ियै खुदा नखारी सकदा ऐ।

44. कबूल करगा अपनी भुल्ल तां दुनियां दा रक्खवाला,  
सुखी गड़ाकें कन्नै तेरी जिंदगी भरी देग्गी,  
इसी बनाई ओड़ग शैल ते पैहलें थमां आल्लाह,  
तुगी खुशहाल ते मनसुख ओह पैहलें जन करी देग्गी ।

अल्लाह पापियें पर निं दया करदा कुसै चाल्ली  
प सारे भगत धोखुएं दे मुहें जंदरे लांदा  
उ'दे शा माफी मंग, तेरे कोल वक्त ऐ हाल्ली,  
नितां तूं आफतें गी भोगदा रौहगा करलांदा ।

अगर प'छतागा तां खदेड़ी ओड़ग सब विघन तेरे  
तेरे दुश्मनें दे मैहल मनारे ढेई जांगन  
शुभ-शुभ होई जांगन झिश्टी च सारे लगन तेरे,  
तेरे बैरी सारे चुटकी-चुटकी दिखदे रेही जांगन ।

दुनिया च असैखां जीव न, ओहदे शा डरदे न,  
उ'दे पकीजा सिद्धांतें दा पूरा पालन करदे न ।

45 मि'म्मी जाननां 'बिलदाद' जो किज तूं गलाया ऐ,  
'जोब' ने जवाब दित्ता हा बिलदाद गी पही एह  
मिगी बी इल्म ऐ पुरखें असें गी केह सखाया ऐ,  
मगर माहनू दी केह उकात ऐ परमातमा अगगें?

अगर खड़ोई बी जा कोई उ'दे नै बैहस करने तै  
जवाब देई सकै निं इक्क बी ज्हारें सुआल्लें दा,  
कुदै लगदा निसो ऐसा स्याना मीं जिकरने तै,  
तेहास लेइयै तुस फरोलो भामें लक्खें साल्लें दा।

खुदा असीम ऐ, अनसम्म ऐ ते शक्तिशाली ऐ,  
बची सकदा ऐ कु'न पही ओह्दै कन्नै टाकरा लेइयै?  
मनुक्खी ईन ओह्दै सामनै भलेआं रोआल्ली ऐ,  
भसम होना ऐ निश्चित ऐसा पंगा सिरफिरा लेइयै।

इन्नां कु'न ऐ बख्तावर उ'दै कन्नै फड़िंत लै?  
दफें, दलीलें स्हारै ओह्दे कोला बाजी जित्ती लै?

46. जेहदे तमामै मूजब फ्हाड़ बी पटोई जंदे न,  
जेहदे जलजलें नै धरतरी बी फट्टी जंदी ऐ,  
जेहदे हुकमै मूजब सूरज लोप होई जंदे न,  
जेहदे शारे प तारें गी हुकम न्हरे चट्टी जंदे न,

जिन्नै सुर्ग सारे अपनें हत्थें घड़ियै तान्ने दे,  
जिन्नै ज्वार—भाटें गी नुहाया अपने पैरें पर,  
जिन्नै दुनियां च सब जीव जैन्तु आपें आहन्ने दे,  
जिन्नै कीता ऐ समराज लागू अट्टें पैहरें पर ।

जेहड़ा करदा ऐ अनगिनमें, अनजकीन निं चम्मे,  
ओह मेरै इर्द—गिर्द ऐ प मिगी लभदा निं बिलकुल,  
ओह तां गै मन करै जो, मेरे कोला खोई लैंदा ऐ,  
उसी कोई रोक़ी निं सकदा एह भामें जचदा निं बिलकुल

उसी कुंन आक़खी सकदा बाड्डो—बाड्डी की करें करना?  
कबत्ती जिंदगी तूं इन्नीं डाहडी की करें करना?



47. जिच्चर क्रोध नेई छोड़ग तां उच्चर केह सुनग मेरी?

उन्नै कन्न बंद कीते दे—में केह सुनांऽ उसगी?

ओह मेरी सुनना गै निं चांहदा, ध्यान होर सें फेरी

मिगी पताड़दा रौंहदा ऐ मुनसफ की बनाऽ उसगी?

ओह चांहदा ऐ में ओहदे कोला माफियां मंगी,

दलील सुनना निं चांहदा ओह मेरी बेकसूरी दी,

ते बेकसूर होंदे होई माफी में कियों मगां ?

उसी लत लगगी दी हजूरी, जी हजूरी दी ।

ओहदी जी हजूरी करनी नेई पर रैहम मंगां नां,

मिगी जकीन ऐ जे ओह मेरी अरदास नेई सुनदा,

ओहदी बे न्याजियें दै कन्नै जिगर पंगा नां,

लेकन ओह मेरी अरदास एह पुरयास नेई सुनदा ।

ते मेरे चीथड़े प्रचंड अंधियें जुआंदा ऐ ।

त्रट्टां मारदियें पीड़ें गी मुगता बधांदा ऐ ।

48. बगैर कारणें दै ओह् मीं साह लैन नेई दिंदा,  
ते मेरी रूहा बिच्च कौड़तन गै कौड़तन भरदा,  
मिगी हठी गलाइयै, मतंकें गी, करदा शरमिंदा,  
मेरी गौहारै गी भलेआं नज़र अंदाज ऐ करदा,

में तां गै आक्खनां, परमातमा अत लटरमस्त ऐ,  
उसगी पापियें निरदोशियें च फर्क नेई दिसदा,  
कुसै दी मौज़ ऐ जां कोई दुरघटनाग्रस्त ऐ,  
जो बी आई जा फांडे च ओह् ते म्हीसदा गै म्हीसदा ।

जदूं कोई हौलनाक हादसा लोकें गी पींहदा ऐ,  
मसूमें दी तबाहियें उप्पर खुल्लम—खुल्ला हसदा ऐ,  
ताहन्ने मारियै खुददारियें गी करदा नींदा ऐ,  
खस्ता हालियें च भगतें गी ओह् रोहब दसदा ऐ ।

जिमीं लुच्चे, लफंगे, नास्तकें हवालै करदा ऐ ।  
बनाइयै पाप बुछकड़ी इसी संभालै करदा ऐ ।

5. अल्लाह करदा गल्लियां भगतें गी चट्टी ।  
भरनी पौंदी लाजमन गै चब्बू बट्टी ॥  
चब्बू बट्टी भगत बी पही लग्गे दे रौंहदे ।  
दिन जिस चाल्ली कोहलू दे ढग्गे दे होंदे ॥  
पर दिन होंदे ठीक जे होवै भगत धड़ल्ला ।  
सिद्धै रस्ता आई जंदा ऐ ओहल्लै अल्लाह ॥

49. पवन घोड़े दै उप्पर मेरे दिन न द्रौड़ा दे सरपट,  
झोक मारिये जि'यां न टुट्टी पौंदियां इल्लां,  
ते फगड़ी लैंदियां न पैचड़ें च चूहें गी झटपट,  
ते ठीक होंदियां निं रुहां इंदियां भैड़ियां भिटलां,

जदूं में आक्खना दुआस चेहरा टुनफुना करगा,  
तदूं में पीड़ें दे डरै दै कन्नै कम्बना लगना,  
मेरी बेकसूरी दा जकीन निं, तूं दम भरगा,  
इ'यै सोचियै में अपना—आप त्रुम्बना लगना,

पही की अपनी आतमा जोखमें च पान्नां में इन्नी,  
सुहाऽ ते पानियां दा घोल मलनां अपने पिंडे गी,  
ते बर्फ लेइयै टंडा जखमें उप्पर लान्नां में इन्नी,  
जो रोकी ओड़दी ऐ बिंद कु पच्छें दी चिडें गी ।

कीजे तूं जरा बी ढेल नेई देनी ऐ जबरें च,  
ते मिक्की धिक्की ओड़ना ऐ तूं नर्केनी कबरें च ।

50. खुदा मनुक्ख हैन्नी मेरै आंहगर, ओह मेरै कन्नै,  
करै की गुफतगु, मेरी सुनै ते अपनी बी दस्सै?  
खुदा ओह सागर ऐ जेहदे निं होंदे पत्तन जां बन्ने,  
क्रैहती कप्पड़े में हून सुट्टां कोहकडै पाससै।

खुदा ते मेरे झगड़े आस्तै कोई कचैहरी नेई,  
जेहदा दौन्नैं उप्पर हक अदालती होऐ पूरा,  
जदूं तक मेरे परा हतदी तेजरीं कटारी नेई  
जदूं तक शक्क निं मेरा खजालती होऐ पूरा।

अदूं तक में उ'दे शा डरदे—डरदे चुप्प रौहना ऐ,  
अदूं तक रोशनी निं होनी न्हेरा गुप्प रौहना ऐ,  
खौफ अल्लाह दा बोल्लन निं दिंदा मिक्की बरोबर,  
उसी गलाओ मेरे अंदरा एह खौफ ट्हाई दे,

जेहड़ी तलवार ऐ रक्खी दी मेरी कंढिया उप्पर,  
उसी अलैहदै करियै ओहदी मयाना च पाई दे।

51.पुही दिक्खो कियां में शिकबे—गिले अवाजरौ करनां,  
कियां पिट्टियै अचैनिएं दा तजकरा करनां ,  
कियां नाइन्साफियें खलाफ रोस्सा रोह् करनां,  
कियां अपनियें बदबखितयें दा तबसरा करनां।

में पुछगा अल्लाह कोला, मेरै कन्नै बैर की पाया,  
मेरा शरीक निं तूं ना गै सरबंधी निराकारा,  
मिगी नशाने उप्पर रक्खियै तूं कैहर की ढाया,  
जे तेरी मैहमा बिच शामिल एह् ब्रहमांड ऐ सारा।

की तक्क लाई करी मेरे प लौहका बनन लगेआं ऐं?  
तूं एह् केह् करन चलेआं ऐं, तूं एह् केह् करन लगेआं ऐं?  
नजर मनुक्खै दी सीमित ऐ, पर तेरी सरव्यापी ऐ,  
उमर मनुक्खै दी लौहकी, ऐ उमर तेरी बेहद्दी ऐ,

बनोने ते बनाने आहल्लें च केह् पिट्ट स्यापी ऐ,  
तूं मिक्की पापी समझने दी कैहल्ली गंढ बद्धी ऐ।

तुगी खबर ऐ में बिलकुल कसूरवार हैन्नी सो,  
तू कर चेतै, जे मित्ती लेइयै, मीं तू ऐं बनाया हा,  
तेरी मेहबानी छुट्ट मेरा पार हैन्नी सो,  
तू कर चेतै, जे मित्ती दे पुतले च अपना प्राण पाया हा,  
मिगी दुद्धै दै आंहगर दुनियां बिच भेजेआ हा तू,  
मक्खन, धयो, पनीर ते कलाड़ी आंहगर गुण देइयै,  
खुदरासी दा सबक दिंदे बेल्लै आक्खेआ हा तू  
“मनुक्खी जूने गी सोआरेआं तू मेरा नांऽ लेइयै।”

..... कुंवर वियोगी